

四庫全書

集部

欽定四庫全書

集部

文莊集卷十六至十八

詳校官監察御史_臣李陽樾

檢討_臣何思鈞覆勘

謄錄監生_臣黃維

謄錄監生_臣范重榮

謄錄監生_臣章儔

欽定四庫全書

文莊集卷十六

宋 夏竦 撰

上書

上章聖皇帝乞應制舉書

景德二年十一月將仕郎守潤州丹陽縣主簿臣夏竦
謹齋戒昧死再拜上書崇文廣武聖明仁孝皇帝陛下
伏以國家採漢唐故事恢復制科網羅賢俊鎔範太平
陛下聖政日躋廣分條品崇二聖之不緒冠百王之盛

事萬方文明多士勇進嘉魚有得賢之詠白駒無空谷
之戀臣生逢聖明幼肄簡謀久困寒賤不能自達去年
秋薦名天府屬邊障多故羽書遄午陛下臨遣宰臣折
衝河朔先臣供傳遽之職立矢石之地忘家徇國失身
行陣陛下哀臣孤幼任之州縣鞅掌之暇服膺稽古欣
睹明詔遽釋憂慮何則陛下廣文武之科而興文武之
治夫鉛槧方策文之器也辭藻辯博文之用也御器以
道則仁義忠信無所不至矣御用以變則刑政教化無

所不達矣步騎金革武之器也敢毅勇捷武之用也御
器以道則奇正威惠無所不逮矣御用以變則盈虛紆
直無所不計矣蓋古者愛其道而今也愛其器古者觀
其變而今也觀其用故文武之材比及於古者可多得
若能臨器而知道臨用而知變精儒墨者兼之以韜畧
善攻取者贊之以學術則將相之材去此焉往願陛下
詳而察之若陛下必擇狂夫之言思納愚者之慮垂旒
下拱渴待忠讜則臣願以賢良方正能直言極諫科名

赴明試則賢良之科斯為具體夫賢者智之苑囿良者德之蹊徑方者慎履名教正者斥遠邪佞直言足以陳時弊極諫足以敷讜議時弊既陳則明於體用讜議既敷則造於教化明體用者豈昧於六建達教化者豈微於七德故臣之區區盡在於此惟陛下

原本缺二字

所志辨

而明之裁而擇之若陛下以枕石漱流為達則臣世居市井若陛下以金榜丹桂為材則臣未忝科第若陛下以鳩杖駘背為德則臣始踰弱冠若陛下以荷戈控弦

為勇則臣生本綿弱若陛下令臣待詔公車條問急政
對揚紫宸指陳時事猶可與漢唐諸儒方轡並驅而校
其先後矣伏願陛下念忠臣之後寬萬死之責召詣闕
下令畢其辭退就鼎鑊死且無恨干忤聖聽臣無任待
罪戰汗惶懼之至臣某稽顙頓首死罪死罪

狀

降聖節進奉狀

伏以真游降鑒誕啟於僊源令節凝祥茂宣於帝祉臣

謬塵樞近叨奉恩榮慶東戶之期久披於丹質祝南山之壽幸及於嘉辰載惟縷帶之微願續乾坤之德

進瑞稻圖狀

伏以嘉蔬吐秀黔首告祥初擢一莖異劉欽之界內乍分三穗疑蔡茂之夢中既介祉於清流爰考靈於瑞牒此蓋尊位皇帝陛下四方無事萬國可封嘉雨霑乎仁恩陽春流乎惠澤河洛圖書而並至元符黃瑞以偕臻將讓德於岱宗致耀祥於嘉穀足使維揚昔日追

魏魯生南海遐方遙慚九熟未讓奇於穎麥詎貽誚於
兩岐掩周祖之維縻陋漢宣之靈稷臣叨提郡印獲覩
國祺既當列狀以升聞敢不奉圖而稱獻天孫助祭願
陪百里之禾清廟薦新敢繼神倉之穀

再進瑞稻圖狀

伏以一莖三穗已告靈休踰月再生益符馨烈祥經闕
載鴻策靡聞陋唐侯異畝之祥冠周室盈車之瑞此蓋
尊位皇帝陛下儀三五之景鑠憲八九之明光當時龍

半漢以爰飛致嘉穀歲蕤而薦秀臣敢不重圖瑞穎再
貢丹墀願隨縮酒之茅廣備泥塗之禮

謝宣召入院狀

右臣今月某日翰林待詔某至臣所居奉宣聖旨召臣
入院充學士者使軒條降恭被於褒言宸澤旁流擢升
於內禁循涯失措荷寵若驚伏念臣本乏異能仰逢昌
運先皇帝初臨軒陞首賜科名遂結綬於仕途俄濫巾
於顯次本西垣更直叨預於司言內閣參榮彌慙於備

問自爾踐更中外遷貿星霜出則分銅竹之符之龔
黃優異之績入則游龍鳳之館非嚴樂待從之才去歲
以式罷藩條歸朝法坐改畫省貳卿之列附神臯內史
之權輦轂密清蓋仰遵於聖訓條綱明其實動稟於朝
經僅免曠官敢期進秩遽推恩於中旨俾廁職於內庭
矧玉府之近局擬金鰲之真境論思為重或接於睿謀
演潤攸施式嚴於密命豈期辱昧可稱甄陞此蓋伏遇
皇帝陛下上智燭幽純仁求舊以臣一門遭遇荷異寵

於累朝念臣孤跡踐揚歷清塗於二紀特垂綸渥擢寘
禁林謹當仰副文明虔脩職業雖已臨於暮齒亦勉勵
於瑣才奉四境之文謹裁於書詔循三輔之政用肅於
都畿報國是圖捐軀斯在

謝賜御書詩狀

右臣今月二十四日宣和門御閣蒙恩面賜臣御書侍
宴詩一首者宸極凝暉方參於進牘奎躔分曜猥奉於
匪頒蹈躍相趨慶榮交及伏惟皇帝陛下文明繼志剛

健承天暢謨訓於七經精字書於八體每罷華光之講
即抽路扈之毫載揮魚網之牋屢竭金壺之墨翻回鸞
鵲盈溢縑緗言念侍臣曲記龍潛之舊特推恩賚俾瞻
鶴企之蹤但傳世以寶藏固無階而報塞歡呼感抃倍
萬常鈞

謝賜馬狀

右臣今月某日右侍禁張永德到府伏蒙聖慈賜臣細
馬二匹者戰功未立蕃錫載加乘拜靡勝榮懼交集伏

念臣本微湊畧誤委半符闕隴宿師賦發滋廣河湟伐
叛誅納尚微悵無毫髮之勤稍增營塢之氣不圖使驛
輟賜乘黃事異仲都之能禮厚儀和之賚軍容增壯幕
府相趨此蓋伏遇皇帝陛下俯念舊臣久居邊瑣將安
戍役曲示眷懷天庥分頒既誤及勞之典具裝是飭擔
先盡敵之行冀效銖分仰酬賞勸

乞脩南京大內狀

右臣伏覩大中祥符七年二月一日赦勅節文應天府升

為南京正殿以歸德為名臣到職後躬詣大內謹視
簷其正南內門上有先朝題其榜曰重熙頌慶之門樓
皆損動其下只是依舊雙門未變列郡之制雖有兩闕
雉堞又無朶樓內城之中並無歸德之殿但是顏垣茂
草內有真宗皇帝御製御書南京頌駐蹕詩碑石一片
小屋遮蔽未曾建立其東北隅小亭子一座內有先皇
御製御書駐蹕詩四首粉版門牖不嚴塵埃所闇臣職
在居守理合奏陳者伏以商丘仰當大火寶勢形勝佳

氣鬱葱藝祖肇基之邦聖朝根本之地發祥薦祉應
天順人由七十里而興天乙是資於景亳累三十世之
王文昌始大於岐周用建名都實陪上國與中天而對
峙企洛宅以相望至官局廨居咸從改革而乃闕廷宮
掖悉未繕修漢啟南陽之都唐重北門之館並資壯麗
以示威神况茂陵之餘烈方宣真廟之鳴鑾未遠必欲
仰模太紫上憲甯陬備九寢之儀敞千門之式慮煩力
役或費財征臣今乞依先朝勅旨只創歸德一殿安駐

蹕詩版又以宮室之儀門闌為重猶取諸侯之制未成
王者之都欲乞於南端闢正門三闔東西增朶樓二座
所貴庀工至鮮不日可成仍乞選差八作司臣寮將帶
工匠到此計度却於東京木場事造材植繫棧浮汴赴
當京修蓋伏望聖慈特賜開可所貴宮闕之度稍合於
彝章祖始之基益隆於景命有光鴻祚永膺皇圖

王相公謝賜手詔狀

右臣伏以鳳蘊靈文方承於睿覽芝函密詔曲喻於慈

東祇誦已還兢榮併集伏念臣素微材識竊慕希夷猥
奉綸言總讐金格嘗以三清真境宮室殊名六洞僊遊
羽儀異品雖沿波而粲見盡物本以兼該因寶藏之縱
觀有瓊編之斯在咸區分於部類可悉數於名稱紫府
絳臺臨文而備見雲裳藻衛伸紙以咸窺爰奏御於穆
清用仰資於欽奉伏遇皇帝陛下祇膺道蔭昭事真源
遽班溫雅之辭俯示褒優之意華門輝耀永膺於寶藏
藥簡研覃更期於率勵荷照臨之莫報積感懼以增深

牋

正旦賀皇太子牋

某叩頭言伏以緹管發春清臺啟厯舉椒觴而第頌爰
表著儀徇路鐸以宣風甫新元朔恭惟皇太子殿下明
誠淵塞粹性昭融趨帝室以問安隆天枝而繼體闡門
講學茂胄席之溫文祕錄儲休荷太霄之顧諟珍圖大
定景貺日躋式膺獻歲之祥永固重離之祚某肅將明
命遠託倅車效秋實以無階望日圍而尚遠無任抃躍

歡呼之至限以守官不獲稱慶宮庭謹奉牋陳賀以聞
某以歡以抃叩頭叩頭謹牋

啟

謝生辰禮物啟

伏以函鍾紀律當炎景之宣威大昴儲精屬鉅賢之命
世伏惟某官嘉猷濟俗懿業代工渭水凝祥蚤協佐姬
之兆嵩高發詠爰逢生甫之辰顧裨贊以非勤唯頌延
而增懇有少微禮具如列牋

五月旦啟

伏以氣正南訛日纏東井當沐蘭於楚俗仍聚藥於周
官伏惟某官任重麾旄功昭燹鼎達宏規於義府聳諒
節於宗藩履此令辰倍增休祉豈期台念先示鈞函感
佩之私不任下懇

六月旦啟

伏以候格長羸氣當溽暑雨濯枝而泛灑螢化草以流
輝伏惟某官金石存誠箕裘濟美荷封崇之茂寵宣保

鄭之殊勲履此令辰倍增嘉佑特承睿獎先示誨函感荷所深不任下懇

七月旦啟

伏以西顥司辰素商紀節湛清曦於鶉陸泣瑞露於僊盤伏惟某官寄重藩宣誠堅翊戴著撫封之令望揚分間之英風履此佳辰別迎殊渥豈期台念先示鈞函感愧所深伏增下懇

中書回夏州七月旦啟

伏以金方戒序夷則紀辰起越桂之淒風騰楚蘭之文
露伏惟大王忠規夙茂亮節允孚早膺祚土之封克奉
誓河之寵履茲令朔倍納清休豈謂鈞慈先貽台翰感
銘之至但切下情

八月旦啟二首

伏以律中南呂候及西成漸鴻陸之來賓自雷門之舊
豫伏惟某官氣鍾間傑任重藩維藹銘鼎之世勲厚苴
茅之帝寵履茲令朔倍納休祥豈謂台慈先貽鈞翰感

佩之至伏切下情

伏以南呂還宮仲商紀度陟少明而夕月奏幽籥以迎
寒伏惟大王保塞宣誠戴君罄節仰奉文思之德茂昭
忠毅之規屆此令辰倍承嘉裕豈期台念先枉鈞函媿
佩之私不任下懇

九月旦啟三首

伏以肅霜紀候清日揚輝澄楚潦之餘波發豐鐘之逸
韻伏惟某官忠純挺操屏翰宣威克揚固圉之勞上奉

同文之化屆茲令朔倍納殊祥

伏以肅霜戒候采菊在辰築場圃以務藏飭衣裳而維
則伏惟大王書忠甲令襲寵和門克彰濟美之規允奉
撫封之寄屬茲告朔諒集維祥豈謂台慈先垂鈞翰鏤
銘之至不任下情

伏以肅霜在候無射屆辰禮聞習吹之儀詩著授衣之
詠伏惟某官真純秉節英勇傳家鏤勲業於景鍾載
忠規於甲令屆茲吉朔益迓殊祥豈謂台慈遠貽鈞翰

其於佩服不任下情

十月旦啟

伏以候屆寒英日纏天駟謹擇漁而登賦設朋酒以休
農伏惟某官位冠齋壇威宣漢塞仰奉重熙之運載彰
式遏之功履此令辰倍膺殊祉

賀冬啟

伏以日在建星斗連營室開漢門而候景登魯觀以書
雲伏惟大王韡韡凝華振振著信茂奉展親之德永膺

分物之封履此令辰倍延休祉

代僕射相公賀冬啟

伏以建星底日伯趙司辰發黃鍾初九之聲孕太極函三
之氣伏惟大王分輝帝室流譽威藩早膺選德之封茂
奉睦親之化履茲令序倍納殊休

代集賢賀正啟

伏以黃鍾紀律伯趙司辰紀雲物於魯臺奏版書於漢
殿伏惟大王雍和著譽信厚流徽蚤䟽四履之封茂著

欽定四庫全書

文莊集
卷十六

二南之德履茲令序倍納殊休

文莊集卷十六

欽定四庫全書

文莊集卷十七

宋 夏竦 撰

啓

賀樞密相公啓

伏審欽膺恩制榮踐鈞樞天下幸甚恭以某官六學宣
精三英毓德鍾半千之運為帝者之阿衡著畫一之規
作海內之明表而自弼諧先聖啓迪嘉謨甄別九流裁
成庶務允屬繼明之治愈隆圖任之恩總日月之畿坐

康雅俗治金刀之府釐定舊章因是正位巖廊延暉台
極來遠獨陳於大計懷柔允贊於聖功洎申伯于宣藩
國暫均於德澤而王商真相戎夷彌憚於威名一昨發
御朝真靈區展宸亟入司於留籥實簡自於帝心果協
剛辰誕膺明命正樞庭之重任無鼎席之崇資延登而
體貌特隆詠頌而品流交慶某自陳席幕曲荷陶鎔限
從朝倫闕司奏記積歡心而夙異屬微疹之方嬰肩輿
已及於東平力疾將趨於北闕瞻望抃躍實倍常鈞

賀樞密尚書啓

伏以朝廷巡祭於后祇嚴配於神壤惠加無際慶洽有生飲至辨儀既行清廟疇庸命爵首拜元臣凡受甄陶罔不欣抃伏惟慶慰恭以吏部天官周禮謂之太宰尚書古職虞典實曰納言漢儀首冠於列曹魏制統司於選職大則綜釐庶政次則品擇九流世獎茂勲代無虛授伏况國家崇端右之職須經遠之材簡銓筦而正司率宰衡之兼總以是望高台鉉任重名槐為一人乃睠

之資作九服具瞻之地豈止聯曹建禮奏事明光象北
斗之樞儀總南宮之喉舌伏惟某官允釐帝載敷道
化源左雄奏章動為故事唐約表疏出自手書郭賀仁
明子魚清淨議事務從於寬大臨下盡削於煩苛天光
自比其丹青蜀劍豈方其明達萬事不理誰賡胡廣之
歌三讓彌高屢下鄧彪之詔惠加含卹道服搢紳授符
則戎后款關借箸則羌豪厥角四方無事萬國可封輔
成垂拱之功肇建東巡之議司先置則瑞芝蓬涌紀鴻

猷則麗藻金相暨汾水頌祇扈鸞旗於馳道神光燭夜
奉龍袞於方壇禮備元黃功高鍾鼎以是職彌崇於四
輔官獨守於六卿偉齊以僕射無司平叔以侍中并領
比之聖日難望清塵然而晉寵茂先尚開五府軒崇風
后合冠三階冕旒注意以非常珪組傾心而久待某棲
投有素欣幸最深其如四海無親三台寡援生成有路
只期文命之昌言薦進非材敢望巨源之密啓

賀樞密尚書啓

伏審祇奉制恩入長樞府伏惟歡慶恭以某官懿文偉望俊德端成常袞為當世才臣魏相練本朝故事告徹宰府克懋贊襄之勞賦政別京洛著保釐之績會朔方之奸命虛漢幄以須材尺詔亟頒追車肆覲延英入閣特從雙日而開上兵伐謀升總萬幾之祕圖任之恩惟舊幅員之係胥同某出自恩門適居塞屏瞻泰符而在遠趨翹館以未期下情無任依投欣抃之至

賀樞密副使啟

伏審欽奉茂恩榮叅密命伏惟慶慰伏以某官豐規粹
遠明識周通緬油博達於文經玉帳夙高於武略肇修
邊好當資出境之材繼總戎昭允奉撫封之寄勲庸克
著望實彌優果膺丹宸之東求入贊鴻樞之獻納載隆
命數允副僉諧某素仰聲猷方增慰憐重荷緘封之禮
過形撓抑之辭感佩銘藏不任下懇

賀高樞使啓

伏審祇膺冊命就陟樞庭恩出主知事榮物聽恭以某

官器涵剛實才貫幾深秉忠諒之一心出誠明之正性
旦暮聖辰之會翱翔朝弁之華寢竭猷為益隆體貌鴻
樞之柄專掌於繁機英袞之司行光於寵拜畢大臣之
能事允率土之具瞻某職貳侯封迹遙台座無階慶蹈
有地埏鎔

賀西樞相公生日啓

伏以函鍾統律方熾於陽暉崧岳降神載生於英哲伏
惟某官豐規茂粹懿德冲明獻納嘉猷翊宣大政左弧

紀慶爰偶於誕辰厥篚修誠敢陳於善祝有少微禮具
如別牋

賀叅政給事啓

右某啟伏審祇奉制恩榮陪宰府伏惟慶慰恭惟叅政
穹高生德嶽鎮降靈服百行以麗躬通三才之懿學矧
自便蕃鼇禁尹定神臯時厥中庸略去苛細詳言照理
世浴其清端心在公帝諒其節庶績思乂景命方初官
惟其人政將安往果峻瑣闥之秩式均鼎鉉之尊公枳

是維國柄攸屬任隗之見重於世楊綰之自化於人凡
在有知孰不載躍某早游恩館幸託鴻鈞歡欣所深聳
忭無已

賀內翰劉給事啟

右某啟伏以祇奉寵召勸講宸闈伏惟懽慶恭以某官
道冠九流識包三極闢先儒之塞路首映人師適列辟
之舊章寅禪治體外內之猷畢告天人之爵俱隆矧自
引避當途鎮臨巨屏沈規粹範泯崖略於天和鯁議純

誠留矩模於邦直高風益仰清望攸歸果當纘服之初
顯副優賢之命丹書訪道禮厚於周臣重席談經事隆
於漢會繫茲舊德翊乃聖謨咫尺威顏世逮華光之對
丹青神化佇宣台極之暉凡在有知罔不翹首某幸窺
邸報方遠師門忭躍之誠等夷增倍

荆南府知府學士李給事啟

右某啟早由踈隘獲筮凝嚴官修之業無聞天覆之恩
未報因代親而有請爰昧死以陳章冒禁成愆免官出

守山藪藏疾荷先聖之哀矜豺虎食讒仰至明之未減
四移使竹六變年灰藐是零丁宜夫湮沒某官觀仁以
過棲愛於情目眇井以拯沈馳飛郵而剡奏抵排羣議
申證非辜謂其夙侍清光少知於治體嘗司洪誥多識
於訓辭高議霜明至言金重倬為外舉足感上心而安
國之灰久寒從茲起焰虞翻之骨非媚慮玷知言佩服
所深敷陳罕既

賀司徒侍中啟

某啓伏審欽膺朝冊增寵正司天下幸甚恭以某官崧
極儲靈穹高格業任隗沈正鯁議不回山甫將明庶邦
是式而自惟新大政首幹鴻樞三后在天仰當於顧謨
七月同軌寅奉於寢園送往惟虔勞還甫渥遽刊章而
避寵示挹道以敷風興讓官師益厚忠淳之俗推恩師
傳更隆尊尚之儀果反剛辰聿嚴厚禮廣真封於食采
增崇號以褒功誕告外庭布昭盛德凝和寶鉉發景乾
台萬樞藹其休聲六幕翔於善氣懷生之品載躍攸同

某出自恩門久繫餘照欽聞明命增忝卑衷伏恨條職
所拘不獲躬詣台屏某無任欣榮激切依歸之至

賀玉清承旨左丞學士啟

右某啓伏審華園勸講奉咫尺之威顏曲密侍祠貳熒
煌之台座仰聆恩制伏積欣榮恭以某官峻極降神穹
高生德探二儀之奧祕游六藝之粹精而況內天外人
含華隱曜方圓詎表其際榮悴靡槩於懷鑒達萬情塵
光羣累一言不立澄寶海以皆空兩半同陞游玉池而

甚樂天和益茂心照逾清允副旁求仰禪初載宸帷訪
逮靖館凝嚴荷慶於需恩式陪於鼎輔暫階隆器行陟
近司凡在有生罔不延首某自貽痕玷仰誤品題久困
泥塵闕通牋記右臂為彈方欣鶚炙之求良冶鑄金敢
有莫邪之請門闌尚阻夢寤增勞聞命欣愉倍百倫等
賀晏內翰除景靈宮副使啟

右某伏審祇奉恩俞榮加命秩伏惟慶慰恭以某官氣
鍾辰律識貫天淵秉亮節以光朝鼓英辭而高世夙昭

賢業茂著師規慎基命之惟新罄訏謨而入告周旋三
接導筆舌於天常申敕萬幾諧笙簧于帝典鴻猷灼叙
羣品推高果由巖近之司更益便蕃之數開榮瑣闥克
重於官聯作貳殊庭載光於使範紳綏動色竹素揚芳
實乃眷之是膺俾斯文而有屬當陽圖舊已旌朱邱之
賢絕席奮庸焉避黑頭之拜恭承嘉會超絕前聞某屏
去周行外司漢竹慶登賢之有命悵申禮以無階仰繫
門闥豈任飛越伏恨條職所拘不獲躬詣台屏某無任

欣躍依歸激切之至

賀轉運啟

右某伏審祇膺中詔顯領外臺伏惟歡慶恭以某官學
術粹精風猷凝峙不侮不畏式是古人以猛以寬濟乎
中道獨出羣公之右允當上帝之心引職憲牀抗稜使
斧濱江而北寵貨至饒無刺百城聿當一面方欽聞於
調發竚物集於京坻風旨所傳歡愉交集某幸司符竹
切仰瞻帷獲在恩庥但深跋躍

賀轉運啟

右某伏審密命蕃恩外臺專領仰要司之簡拔實衆志
之歡愉恭惟某官清懿飾躬通閎廸望并包淑哲邁遇
光華資榮近以久隆副僉擇而此厚糾繩康俗適著於
聲猷餽給富邦暫迂其毅斷即聆高最越在親嚴諒伊
遐邇之懷併是瞻祈之切某微姿極下大庇方依戀幸
彌深志銘無既

賀屯田啟

伏以屯田博達文心詳明治體擯桑孔之術不議貨財
斥中韓之談專講仁義近徇常牒出倖盛藩蘭桂之芬
振陽已遠牛鼎之器甄擢匪遙惟善順於天和佇大光
於朝議傾依所至願頌尤深

賀舒州李相公啟

右某伏審肅膺鴻沛起殿大藩伏惟慶慰恭以某官沈
正秉彝清和懿德經三聖之變紬繹惟深貫萬物之儀
臣隣有翼翼屬先朝違豫臣黨興姦密嘯羣邪陰窺時

柄允繫哲輔克殄凶謀防檢未萌澄綜多辟虹氣由是
霽止霄塗為之密清精貫三辰賴深百辟終以狎聞蜚
語引去上司傳致深文越處南裔孤節彌諒高揖自冲
處榮悴之交人言無間失左右之手國體幾虧大號繼
明巨慝咸露狐鼠失其深穴豺虎食於譖人協氣雲翔
皇明電照澄洗司制延即舊臣眷惟襄贊之賢首被優
深之渥慰藉良厚毗倚增隆袁安涕洟念深於王室謝
傳憂樂望結於蒼生雖暫假於鎮臨必坐階於密勿至

公來復有識相歡薦紳傾耳以聆風斯文聯冊而刊美
洪惟高範絕出常均某恪守郡條欽聞朝渙不獲拜伏
車下奔走道周但私慶於單危將永歸於埏鑄

壽州相公啟

右某伏念閭外之邦宜嚴所守弗當便道增仰貴台託
身垓北之鈞早繫大庇之託熒煌之坐合謹彝儀恭惟
某官純嘏光朝大猷稽古河帶山礪預叅藏府之盟蕭
規曹隨聿冠宗臣之列席兩朝之縟賞塞四海之具瞻

雖復暫避繁機出臨巨屏長城萬里固蒙福於靈河華
闕九重率乃心於王室疇庸方切圖任有歸佇再正於
洪區永增輝於盛旦空踈之迹終始是依某無任依棲
禱頌激切之至

潭州李兵部啟

右某啓伏念某屢竊虎符甚安鳩拙不當便道絕欸緒
風逖望朝髦夔分霄壑地頗賒於河潤心但切於旌搖
恭以某官直道在公懿文飾政入端朝著羣公讓於苗

馮出總使條舞吏空其囊橐逋民咸復美化大敷然自
郡本股肱召莫先於季布治緊寬猛政焉避於國僑傾
聽旁求用紓勞想炎涼改候葆嗇是宜頌咏之私不任
丹懇

賀薛待制知開封府啟

右某伏審祇奉制恩榮莅天邑伏惟慶慰恭以某官宏
猷體遠精識鈎深嘉言奮乎黈聰懿文縉乎邦憲而自
宸帷訪逮計省踐揚瑞鳳覽暉儀鴻筵羽體貌之榮雖

渥彌綸之業未宣乃眷浩穰遂茲尹正羣玉上帝之府
克峻於官聯太微三光之庭茂延於畫接式夫古訓時
厥大中前趙後王方仰追於懿範左輔右弼竚協贊於
訏謨遘東惟新游談胥慶某出麾外服遐抃吉音燕厦
莫趨鳧藻增躍

正旦賀內翰啟

右某伏以書得夏時標物生之令候星回呂紀在歲始
之常經恭惟某官履道淵冲炳文宏博總直轡以高蹈

擁大璫而遠遊通內相叅決之謀進扶鴻業代主上深
厚之訓輝映前圖企聽簡良居承弼化率是海隅之衆
盡調鼎實之和伏想贊翊循經練頤多暇履茲初歷倍
納蕃禧某早飾冗才叨偕巨庇祝頌斯厚敷述奚殫

賀冬至啟

右某啟伏以南至啟辰聯星貫彩闔漢門而候景登魯
觀以書雲恭惟某官文武兼資勲賢莫貳仰鍾河岳之
瑞聿膺夢卜之求德冠生民道高羣后宗祊倚重方宣

可大之功海域具瞻皆罄履長之祝某式提譴成久累
洪鈞阻陪介壽之班唯積戀軒之感依投繫仰倍萬品
流

問候太傅啟

自間風規屢移年籥忽墜奔雲之翰彌縈搖旆之心伏
惟某官懿德遠聞芳猷夙茂旅弓白羽妙絕於等倫玉
帳絳宮精通於機會佇奉戎昭之寄式彰勇冠之材六
轡方馳清談尚阻惟希冲養以副願懷

問候尚書啟

近拜郵書仰通鈴閣遽承鈞誨實聳朝榮獎飾有加銘
藏罔喻恭以尚書浚明著德寅亮成規四方于宣允叶
維周之詠萬邦為憲方歌受祉之詩佇正位於近司永
流徽於民表伏冀為國自愛副民具瞻某早荷重知誤
攀多士銜舊恩而莫報懷深頌以徒增棲倚之誠倍百
常品

省副郎中啟

右某伏以三陽之律初宣式新庶彙一歲之端肇正爰
著前經恭惟某官妙味宅心懿文秉德越丁復旦潔履
仕途計部贊規克謹牢籠之典丹墀詔爵即膺近密之
資方屬令辰諒延殊祉某夙叨齒記但積瞻依

回雄州館使太保啟

屢馳丹懇仰瀆清規遽捧報章實銘懿念伏惟某官書
忠甲令紀績太常已久肅於邊庭行入參於樞府方新
歲律更順天和願頌之懷倍百常品

免奉使啟

比膺使指往奉歡盟選授至艱道塗差近况多侑幣實
濟空拳然念頃歲先人沒於行陣春初母氏始棄孤遺
義不戴天難下單于之拜哀深陟屺忍聞禁休之音車
府露章槐庭泣血王姬築館接仇之禮既嫌魯子回車
勝母之游遂輟荷兩宮之大庇載三事之昌言退安四
壁之貧如獲萬金之賜某官力持名教數獎孤寒屬商
利於摘山闕言心於奏記何圖驛置先墜書筠俯哀蹈

義之心不辱資忠之訓永唯佩服何但銘藏卑情不任
感咽依歸之至

文莊集卷十七

欽定四庫全書

文莊集卷十八

宋 夏竦 撰

啟

謝授知制誥啟

蒙恩特授前件官充職者紫微祕掖塵書命之司丹屏
儀曹叨奏疏之任尚兼載筆仍贊殊庭恩獎有加心顏
無措此蓋某官蚤垂願采曲借光儀是致鴻鈞誤甄微
物矧著龜先見嘗昭示於前期松柏後彫忽遠流於榮

問夫何後進辱此重知顧報遇而末由但銜恩而有素
區區之懇莫喻萬分

謝起復授知制誥啟

伏奉制命前件官陳避不允者靡依茹痛瞻風木以隕
心圖舊延慈俾墨衰而從政未能毀滅惟竊震惶竊念
某本以諸生嘗階近侍如絃謬直伺免甚愚爰六剖於
銅符遽九遷於圭籥采蘭就養解綬而靡遑陟屺銜哀
號天而罔續式遵治命歸葬近畿宅兆未安杯圈如此

豈謂誤傳詔版許復故棲三歲免懷乞終于喪紀兩宮
愛下莫寢于徽章強整殘軀再司舊物此蓋某官薦延
有素保宥特深致茲放浪之蹤薦游清切之禁懷鉉久
廢但重學於畫脂弄杼非工敢更言于織素唯期盡瘁
少謝生成卑情不任感媿哀咽之至

謝某官啟

祇荷寵光不任榮懼伏念某器能無算材識非奇幸際
會于昌辰亟忝塵於近列徒更寄任莫著聲猷竊位樞

庭詎彌綸於密命脩負鼎席莫寅亮於大謨此者伏遇
國家欽奉真游誕均蕃錫加勲臣之美號進公府之崇
資兼並戶封愈隆命數循涯多媿敢忘周任之言昧進
誠難亟效范宣之讓雖削章之繼上顧出綽之已行但
知受以周章固退思而恤墨此蓋某官因承清宴曲借
餘輝致此庸虛荐塵優渥敢不盡瘁事國少逃濡味之
譏夙夜在公更竭負山之力感銘之至不任下懷

謝大王啟

叨膺恩制載錫徽章祇受以還兢惶靡措伏念某遭逢
運會忝冒官常自膺圖任之私莫著謨明之效昨者國
家欽承真御逖諭鴻源範肖象以惟寅建殊庭而有翼
豈謂具臣之幸特膺置使之榮仍益爰田尤彰異數顧
湍盈而是懼實避讓而靡諧叨據踰深周章罔踰此茲
大王嘗因密侍夙借公言致曲荷于寵靈惟仰銜于殊
造永言媿佩但切丹衷

南京到任謝二府啟

仰承獎擢伏積兢榮竊念某本實庸人妄干榮進早緣
誤寵亦玷近司上賴保全獲均勞逸一昨東秦閔雨下
戶將飢猥奉詔函就分使竹殊昧救寧之理莫寬盱眙
之憂事雖欲於防虞言或多於過切當朝廷責實之際
固巖廊精汰之辰襍被自隨屏居是分豈謂伏遇某官
俯矜舊物深屈至公仰贊恩章俾釐留府典銅魚之宮
鑰合銀兔之軍符周微子之封圻漢鄼侯之寄任載惟薦
短曷副坯陶惟更勵於駕材用少躋於元化感慚刻著

倍百常鈞

永興謝二府啟

出自坯陶伏深感戀竊念某人品駕下世胄孤平繼典
九城薦更三紀無一毫之可錄悵十駕之空勞嚮者召
自別都俾司會府服勤徒切析利非精矧從視事之辰
便主摘山之議逮成秦格幾汗簡書爰以細札垂文陽
郊錯事泰壇備物方畏瘵官齋幄還衡甫寧悸魄攝須
稍逸垂翅將安彌仰恃於哀矜冀且參於下吏豈謂伏

遇某官因陪漏刻誤憶姓名議四鄙之羽書按東曹之
邊瑣拔於端右付以戎昭六纛啟行光華籍甚萬錢賦
祿訾計差溫中外誚其何功文武譏其不次載惟求舊
深累至公敢不更勵忠規上疇元化滅烽未日既耻於
家為數級有時或期於天幸指玉關而非遠瞻鉉府以
方遙媿荷依依萬倍倫等

授宣徽使謝二府啟

右某蒙恩特授前件官者元化均分近司進拜殆非功

次有誤寵章伏念某偶以孤生謬緣薄技攀仕塗者四十載竊民政者十五城而况兼護將屯悵絕弦之未遂創圖羌事慚唾掌以難裁猥陞四貴之華頗玷十連之長人譏多幸自訟何勞此蓋伏遇某官登翼大猷矜嗟舊物量衆恩於邊瑣較前職於省闡昭衡石之至平灑霖雨之餘潤萬金屢費適寬責帥之文十使兼加方切摧兇之效敢不益張晴膽更厲偏裨庶集羣勞仰酬垓冶

永興再任謝二府啟

右某蒙恩授前件職并知永興軍府到任上訖出自垣
陶伏增感懼竊念某頃嘗佔畢素不知兵特假幢麾比
長關中之戍親臨矢石俄為隴上之行徒肄業於蠅矛
罔追功於橫草猥荷向隅之慙猶書守塞之勞冀願興
區方膺於外徙河潼石壤亟復於故棲實總攝於百城
且并獲於諸道金印駢組盡兼數使之名玉帳建牙爰
當上將之任倚辦尤重堪副誠難此蓋伏遇某官登翼

皇猷布昭元化圖殪目中之敵先增閭外之權首念樸
忠驟加寵數既騰譏於帥賤將責效于功除敢不祇慎
戎昭恪遵廟畧武暢西海儻橫厲之有成生入玉關固
哀憐之是望永言報塞敢憚勤劬

并州謝二府啟

右某蒙恩

原本闕

西陲用武寸效曾無北道乏人無謀猥

及負責斯重戴恩則深咽喉要衝股肱舊地旁連馬邑
直控鴈門周宣中興茲嘗薄伐漢武懷遠此焉觀兵屹

然形勝之區紛爾轉鬪之地思得良士倚為大藩某素
無兼才暗於臨事精誠內耗齒髮久衰上馬據鞍雖自
矜於矍鑠登車攬轡尚有志於澄清然念孤蹇多艱功
名難偶事方創置謗輒隨生孤根易搖衆口難辨指嘗
戾臂志不酬心尚賴丹宸至明黃閣垂庇曲藏痕殿勤
賜保全勉策暮年俾圖後效孟明屢辱定收三戰之功
孫臏何堪終期萬弩之發

回謝二府啟

幸會昌辰誤塵近列仰荷同寅之德唯增有覲之慙豈
謂鈞慈曲記生日俯垂榮誨形厚意以居多仰佩殊私
鏤丹誠而增切所貽盛禮焉敢克當

涇州謝二府啟

仰戴坯銘實難堪副伏念某本由寒進妄齒清流三品
崇高屢更於都座十城固養遽剖於軍符未嘗練達兵
鈐習知戎警猥奉臨涇之後敢辭負羽之行漢惟六郡
之雄唐兼四鎮之重宜得飛將倚為長城豈謂伏遇某

官登翼大猷斟酌元化曲矜嗟於舊物特選補於邊屯
仍加置於使聯俾專司於武旅望巖塗而馳應撫駢組
以知榮懼上累於甄陞益俯加於策勵兼程赴治周覽
根心顧樓雉之未完且租更之甚闕逢烟在望固當西
鄙之咽喉營壁空存無復北庭之組練願更寬於轡策
庶漸葺於封陲愧荷依投倍百倫等

謝魏閣使啟

伏以太尉先令公維嵩宅粹間氣凝祥媯汭降嬪極三

朝之眷待台槐襲慶陟四近之尊崇功在旂常政傳謠
頌仰圖英烈允屬鴻儒豈謂某官特示哀誠見求鄙製
雖早承知獎備熟於音徽而載聲庸虛莫周於事實緝
粹音而僅就鏤翠琬以為慚敢冀仁明過垂恕察兢灼
之至不任下情謹齋沐譔成先令公墓誌銘一首隨狀
呈納

謝叅政啟

昨以總司帑藏謬纂綱條洎叅校於權衡竊審詳於鈞

石豈謂鴻私曲被優詔薦頒將並刻於堅珉庶永傳於
內府恭以某官豐規冠世明識過人幸久荷於殊私遂
仰塵於英聽遽示緘封之禮載形獎與之辭况近列之
至崇辱前銜之過重但銘藏之增切顧當捧以尤難悚
惕之誠倍百倫品

謝西京尚書啟

伏以尚書懿文雅正妙識融明避中鉉之鈞衡奉西都
之筦籥惟保釐之允迪固樂只之攸宜方企旆旂遽承

簡翰玉音無數式慰於深心鼎席薦陞佇光於善頌傾
思銘佩文不盡言

回大王啟

辛鍾運會誤玷台衡屬當生育之期方積劬勞之感猥
蒙鈞念曲示誨函仰承仁厚之私俯集媿銘之素所頒
盛禮安敢克當

上親王啟

某啟辛會熙明叨塵機近揣分深慚於昧進依仁實賴

於同寅式當生育之期方積劬勞之感敢期鈞造特賜
榮緘荷眷與以尤深積銘藏而莫喻所貽厚禮焉敢克
當

謝樞密相公生辰啟

本以非才幸逢嘉會莫著謨明之效但貽昧進之譏豈
謂鈞慈俯記生日降緘滕之榮問示筐篚之厚儀載揣
庸微固難克受感銘之至不任下情

謝宰臣惠食物啟

伏奉殊恩俯頒異味仰惟顧錄蓋不遑寧伏念某胄緒
寒微學識蒙闇無近親可以仰給無先疇可以躬耕幸
依賴於門闌得叨塵於官序西崑抱槩遽獲於依仁東
閣食魚仍容於庇族曾無鳴盜之淺術徒恃簪履之舊
恩時奉光儀特惠顏色掩愚陋之累聳殊尤之觀復念
食貧深矜分薄屢垂賑濟俾育孤遺當雨雪之既零知
藜藿之不給載形軫卹輟賜饒羞食五侯之鯖無慚上
客持左手之螭寧媿昔賢顧舉族以分甘念何門而展

効心同白水期誓節以無渝命等鴻毛冀時恩而有所
退量微忝唯切戰兢

回學士啟

遠承尺牘無示青編究作者之楷模振古人之風烈况
斯文方盛公議有歸佇膺前席之求幸息沉僚之歎感
銘所至願頌良多

回謝學士啟

伏審光奉茂恩榮膺寵數伏惟某官豐規茂粹雅度淹

通龜紫傳家允叶芝蘭之譽縑緙隸志克彰黼藻之文
而自射鵰飛英銜標擅譽遽升榮於匠署仍闢掌於郡
條大宣五袴之謠爰上三年之計果試言於宰府亟引
籍於朝閨石室討論閱緹油之祕遽蘭臺著譔颺茜綬
之光華彌著清微允符公議某正深慰憚忽奉緘滕載
闕雅麗之辭唯積媿銘之素

西京留臺謝少卿啟

向者令嗣還臺榮緘垂問屬常居於賜告遂久闕於報

章廷企清微但深遐想近審蓬丘進秩示獎於耆儒梓
府分曹尚優於冲攝諒惟褒命彌聳高風尚遠披承更
希遵愛

回徐舍人啟

某聞太一三光之庭仰昭於天象內史八枋之法實掌
於王言聳禁近之榮階極斯文之盛選欽承茂德允謂
當仁恭惟某官風格粹和識度彌遠懿行推於倫黨興
學本乎宗師書觀縻賢盛有滯留之歎官曹率職累更

繁鞅之勤環望流聞淵衷妙簡亟試才於槐府俄錫命
於綸垣景祚增光有識交慶固將辭成楚寶體變漢風
斧藻凝猷鼓動中和之氣羽儀嚴侍翕彰奇異之能忝
預朋從忻聆進推結綬甫陪於過躅披滕遽沐於芳牋
恭窺辨麗之功益仰謙虛之美其於佩服罔罄敷宣

漢東太守司封啟

某頃首頃歲從莊穆靈駕嘗傾蓋滎陽道中二十年矣
比者謫官江濱久陪隣好過客翩翩未嘗不沐虛獎尋

屬使節東案澗水大門荒阡特蒙增殖松楸今已成林
其為恩舊若此而疊委公函遽茲相外豈以後進驕氣
未祛是將待小子於名利之交歟幸緣雅素改賜手誨
庶依仰之有地新萍已拜受訖還源觀文敢冀垂借今
附雲峯二器聊飲從者流暉電激塵事蠡午某限守半
章阻越宴坐不勝瞻望感戀之至

集賢相公辭官啟

伏奉制恩併加命數載循忝冒實積兢惶伏念某性識

顯蒙聲稱淺昧幸遭逢於期會叨踐歷於官常遽塵樞
要之司丞豫台衡之任循名責實曾無致遠之能具位
妨賢深負食浮之媿此者伏遇國家欽承天命茂對僊
游昭積累之鴻源顯顧諟之景祐式均大慶首及近司
進執壁之崇階正躍池之峻秩仍益爰田之賦兼增真
食之封受寵若驚顧何功而可報知止不殆將昧進以
尤難已瀝寸誠虔通勅奏願寢既行之命庶寬若厲之
憂伏望某官俯諒曲衷特矜非據因從容於晝接為啟

迪於昌言儻罷命書永銜恩造

東樞太尉相公辭官上大王啟

伏奉制恩併加命數揣循非據啟處不遑伏念某器識甚微聲猷素昧遭逢朝會忝冒官常踐清切之司固慚於潤色奉彌綸之議莫効於將明薦膺加等之恩亟列兼鈞之任雖思退食益媿妨賢此者伏遇國家至德符通真遊昭假茂對式均於純錫誕敷首被於寵光進掌武之崇資益褒功之懿號仍加并賦兼益真封雖堂陞

於務隆示褒優而過分顧斗筭而易滿懼顛躋以貽憂
已恭拜於囊封乞追還於詔命伏望大王俯矜短拙用
軫怔忡因入覲於凝嚴為特伸於敷奏儻諧誠請永荷
恩私

僕射相公辭官啟

大慶方均鴻恩曲被省循非據啟處無從伏念某器識
顛蒙聲猷淺昧從政之靖恭之譽代言無雅興之辭徒
以幸會休明誤膺眷獎亟正台衡之任薦塵揆路之資

維石巖巖莫允具瞻之望伐檀坎坎甚貽素食之譏此
者伏遇國家道化休明聖風醇暢感真游之報降諭仙
緒之綿長欽修茂對之儀誕受聿懷之福式覃異渥首
及近司瑣闥分曹荷寵章之至重琳宮置使奉明命以
惟新仍加數於爰田兼益封於真食踰涯既極味進誠
難苟竊祿以無厭必曠官而負媿已陳奏牘願寢出綸
伏望某官曲諒庸虛深矜悃悞因入趨於三接垂特達
於一言冀收渙汗之恩用息怔忡之懇

辭官上太王相公啟


固避恩私未俞誠請省循過分隕越無從伏念某本以
遭逢獲諧幾近成亭徹警曾微借箸之勤武帳承顏空
備影纓之列每奉承於成算動遵守於舊章但敷臣子
之常規無益朝廷之大政歲月滋久尸素居多深懷昧
進之憂將避妨賢之路豈謂寵靈薦降命數尤崇令備
職於彌綸復正名於宥密揣躬內訟懼貽覆餗之虞瀝
懇露章願寢出綸之命葵心雖切天聽未迴已再瀆於

凝嚴期特收於渙汗佇聞得請用息端憂伏望某官特
諒曲衷俯矜非據因奉清閒之宴為陳特達之言儻罷
近恩永銜殊造

僕射相公謝授官啟

降成命於慶霄靡容辭避集殊榮於瑣質但切兢惶伏
念某幸會聖明叨承天寵乏胡廣中庸之譽昧孔光周
慎之規四海同文莫借籌於武帳萬錢受俸徒充位於
巖廊此者伏遇國家欽奉真游誕昭仙緒式均茂渥首

及具臣進秩黃樞寔正秉鈞之任列司恭館肇膺置使
之榮復加數於爰田仍益封於真實寵章彌峻輿議謂
何深媿曠虛之質獲叨進陟之榮感愧彌增敷叙奚悉



文莊集卷十八

欽定四庫全書

集部

文莊集卷十九至二十一

詳校官監察御史_臣李陽樸

檢討_臣何思鈞覆勘

謄錄貢生_臣程廷璋

謄錄監生_臣嚴續曾

謄錄監生_臣俞光豫

欽定四庫全書

文莊集卷十九

宋 夏竦 撰

書

上巡撫使張司封書

右伏以國家幅員億萬廢古封建州縣之治責在庶官
用一賢則數十百里有受其賜者用一不肖則數千萬
屋有當其暴者故朝廷年間屢下詔書切責所在長吏
察舉良士而吏道益雜賢者益寡不肖者愈衆其故何

哉蓋薦舉之官罔思沮勸事有驅走暴露艱險刳弊無功而多過者非清苦勤謹則不用也事有宴安溫潤平易整葺無咎而多譽者非親舊暱幸則不用也皆謂公舉受賞不若私舉受罰故舉制益艱而舉狀益謬情害於道可勝紀哉使忠信者惕惕自晦什處伍列但以道俟人人不知則俟他人他人不知則復俟他人終不敢以心腹肝膽從人以求知也浙江東西地長千里亦有退伏兢慄茹蔬飲水以待人者待之不得則復待之復

待之不得則有中夜而起望象魏而北嘆思得賢使者
觀省南夏按察良苦無何精誠所感陰陽有開果遇執
事擁傳東下諭朝廷之意勞問高年疎決囚繫士之有
所待者皆歌忭相慶如早穎焦枯而甘雨垂降誠以執
事豁達正直蹇諤剛毅為國家諫諍之冠冕為蒼生號
訴之梯石終不忍使可以銘鑄翦拂者沉滯於下位然
則執事慰耆耄不如退一貪殘減萬筭杖不如進一
賢才貪殘退則民不待慰而自安矣賢才進則刑不待

減而自省矣貪退賢進民安刑省則執事之功可與太
平無為者相上下豈當與錢穀鹽鐵之官較輕重哉某
丹陽一掌版籍吏耳自幼及長聞執事之風恨不能執
羈勒於門下以滿夙昔之願今執事掄揚明天子之德
慰勞吳會之民故敢竭思慮冒罪憲少布腹心於左右
惟執事者裁念之若令諸有待者不復於他人則某之
區區百世幸甚某再拜

兩浙運使姚鉉書

伏以國家之制內外分職內則中書以發號令樞密以掌兵政三司以計國用外則輸運之司使領方面其職有六其政有五糾姦慝明簡稽察利害平筦權通商賈重廢置之謂六職舉賢使能報功卹刑愛民之謂五政六職修則國必豐其財五政舉則官皆稱其職豐財則無重斂稱職則無弊事然則六職之要在乎糾姦慝五政之大在乎舉賢能何則若執事之塵下地長千餘里官不啻數十百員人心如面罔或純一貪夫徇利皆曰

上官煩劇不暇按省故安於懈惰嗜於賕賂以浼執事
果知而罪之則為惡者沮矣廉吏砥節皆曰上官明允
有能必舉故服於勤恪甘於冰蘖以待執事執事果知
而賞之則為善者勸矣然則多糾惡不如多舉賢傳曰
禹稱善人不善遠矣其是之謂歟故某之有待於執事
也非一朝一夕矣某本無他材癖嗜儒學雖不得經指
而頗知戒訓居貧而固其節臨事而專其守勾乙案籍
之暇則伏讀先王之書日飯寒蔬數十本若牲牢水陸

之味而又侑之以鐘鼓歲服敗綈數千縷若衣文繡紃
綺之裳而又映之以珩珮非不知富貴之可悅貧賤之
可厭也蓋富而憂不若貧而樂者也嘗念事父之日食
飫饘藿衣繒厚絮無何近丁家禍墮於徒勞縣官日給
斗粟數十百錢同爨十餘口齧齧然皆有菜色必貨什
器質衣衾而後充其費窮如是困如是誓不忍學穿窬
之盜蠹耗蒼生而苟且衣食雖清白之吏忠信之民以
心許我而時命艱蹇終鮮知己昨以道干少鄉陳公公

以一言譽之而未深省也退而度生成之地無出執事之門何則某為童之年嘗聞執事豁達正直提幹吾道暨今處麾下復大聞執事薦拔良士盡公無私夙夜緊繫然恨不能負綏執鞭以遂欣慕之心今少卿有鄱陽之命而執事按行常潤某之區區如熱得濯但恨偶縈負薪之疾不能興不及稽首衡鑑之下仰干題品之主豈天復未開某以明公知之乎願執事哀卹窮滯聽察言行若矜其廉慎擢於行伍必能恪居官次守死善道

不敢貪慢以累明德若念其愚直舉之諫科必能待詔
公車對揚王庭不敢佞媚以辱通鑒詩云惟其有之是
以似之書云舉能其官惟爾之能是則善有所在公其
捨諸惟昊天曷日知我之不欺於執事也矣惟執事辨
而明之若執事聽之以為是誠幸矣若不聽之以為非
亦幸矣是與非窮與達皆取必執事願執事不惜一言
而裁之於戲日月逝矣功名未立文以足言頗至狂直

上知潤州陳麗天書

伏以外諸侯之重二千石之貴唱首太平必舉賢雋夫
良樂之廐乘黃伏皐工倕之室榱桷在御豈有賢太守
之庭而無良士蓋知與不知爾伏念某四歲結髮從師
執鉛槧者十五餘載矣去年再踐場屋薦名天府方將
交闕春闈鼓行文陣屬邊陣多事簡書蚤午遣宰輔折
衝河朔先人奉辟請之命供傳遽之職發兵間道陷於
戎事帝用追念行加等之贈舉嗣襲之典命於柴毀之
際固讓不聽外廷有補以縣吏夙心素業堙鬱無訴今

者豈謂遭遇執事總秉部政威望隆峻銓度人物哀卹孤幼故敢以片言薄技深自媒薦所望執事近觀厥言遠察其行蕭艾之畹可擇蘭菊鳬鷺之渚亦有鴻鵠勿謂冗官而非秀孝詩云惟其有之是以似之書云知人則哲傳曰舉爾所知禮稱推賢而進達之易謂拔茅連茹故文子之舉管庫趙孟之出淹滯善有所在人其舍諸然某之所望不敢逮此但覲執事鑒其好學少迴惠顧使他人無庸賤之謗公府減奴隸之責令勾乙之暇

得和鉛弄翰薦舉之際許解官就試必能昂首掉尾自
求騰蹕上以副先人之心下以遂為儒之志遂得待問
都堂揚摧今古射策紫墀條對急政將不在他人之後
以辱公舉語其報效則有先王仁義之道在惟下執事
者裁之

上開封府廉獻書

伏以國家因襲唐制小宗伯歲貢多士率以至公之器
裁為慎選之具而尚士流私議泥而不通身處孤寒則

望權門而怨豪族名籍禮部則陵後生而幸青紫故賢能
之書未上而毀訾之言已滿殊不問其藝如何耳某以
為銀黃之族不無材智金玉之室亦有忠信夫以乘黃
越國豈待十駕而邁逢蒙射鵠何須再發而中是以林
居野處不足以自賢三應五上不足以自貴惟善之所
在爾但孤進有材則居豪右之上鼎族多藝則冠士流
之首又何待畧踐場屋多歷年所而後預等甲英傑者
哉故某居寒賤未嘗怨肩雋造未嘗憂誠以公道有所

屬也今伏遇執事幹張斯文採擷英特豈敢自昧默而
不言伏念某四歲從師讀書七歲學詩九歲學賦十有
一而學文柰何天陋其辭不能脫穎而出今年甫冠帶
方敢抱所有冒鄉舉苟執事照之以龜鑑量之以公器
哀其說右其技得致師文陣賈其餘勇輝煥士林飛躍
亨衢則執事之惠非止謂生死而肉骨於戲以先王仁
義之道取我者我當以先王仁義之道報之豈敢引蛇
雀故事飾為虛言惟執事者裁察之

上晁迥舍人書

伏以先王知文之可以守天下士之可以司文德故擇
聰明方正之臣居左右侍從之列思得薦進以廣儒雅
然則旒冕之側賢者不敢自私其祿皆欲顯忠良拔沉
滯以自效故君明臣忠而後良士大夫進焉帝宋龍興
奄有萬國禮樂之臣列於王庭而陞文章之職居顧問
之地十而有一猶比肩也邇者執事步臺閣蔚有令譽
帝用明試擢居近臣斯文載光遠近交慶孤寒之士皆

離疏釋躋翕然有膏粱之望誠以皇上之明執事之忠
千載一時不可失也伏念某生長閭巷結髮事師抱六
經知談仁義執刀筆知為紀述先哲之行從政之事雖
失其具體而得其枝派其如恹恹京輦間困於塵埃公
卿門閥峻如天梯而不可履物不終否有時而泰果遇
執事不有清貴惠顧寒賤賜見於清閒之際而勉其勞
苦固非敢徼一面之福幸失得之舉但念服鄒魯之訓
累歲月之功不敢自賢以妄進不敢自愚以自退伏冀

執事平權衡以權其輕重開龜策以決其疑貳設鍼石
以導其聾瞽使迷途無長往之歎苦學無虛費之勞傳
曰朝聞道夕死可矣蹤跡如是勤拙如是惟明公裁之

答杜侍郎書

月日具官夏某齋祓再拜復書于某官某跪啓溫教數
四成誦仰銜意愛至感至慰某資性婞很門緒單孑零
丁士途孤苦萬狀恭惟高明素所諒悉不圖黽篆之伎
猥當斧鉞之選戎畧方警理不可辭竭忠盡愚深自策

勵豈意天幸有二成於鉅賢內手捫心何階至此也哉
秦川舊都土風豪侈氣勢相高禮義幾廢腐儒淺識以
為漢唐遺老衣冠舊俗可以三代德教化之過客貽賤
以迂闊相笑小人詆訾或浸淫上聞前史所謂隣城嗤
其不能也而執事力庇其非稱以為是鑠金積羽言下
頓消此天幸之一也黨項餘孽跳梁徼外宿舊亡沒靡
所容度加以罷輒無他智術但憶黃卷中一兩事若武
安之守鴈門謹烽火明斥堠饗士習射數歲不亡失終

然破虜羊祜鎮峴南各保分界無求細益陸抗以為彼
專為善此專為暴是不戰而自服也終亦平吳心頗慕
之以逐麋之犬尚不顧兔豈有將王師而循小利以一
華人易一黨項者哉是欲堅壁清野以須遠畧不求目
前首級之效前之所謂邊兵皆以為怯者也而執事獨
護其短飾以威名衆言十七衆譽隨之此天幸之二也
矧五原塞外地平道闊自古西戎入寇之路臨涇孤壘
去大虫峴止八十里無梟將勁兵控扼衝要而賊騎遠

去高奴山谷纔屬地險兵厚謀臣猛將併在一城而逆
黨窺之無他但勇其難而忽其易謂非材者不能輕重
於敵不足顧也其於謹備西北敢不夙夜竭節以奉明
戒延安之警沿邊將佐皆被朝旨秣馬厲兵分壓賊境
以為聲援旋聞賊騎遁去皆如明識之所前料也所恨
者未能縛致戎首戮之藁街草壯麥黃尚煩廟筭飛芻
輓穀重擾邊民夢寤傍徨未知攸濟又念本出寒緒不
達人事但謂學古入官以為得計焉知以書御馬為世

所嗤獨明公信之憐之豈孔門之道果不負於後人耶
何鉅賢之眷眷若此乎東望旌榮無任瞻依感戀之至
不宣某齋被再拜

文莊集卷十九

欽定四庫全書

文莊集卷二十

宋 夏竦 撰

論

定四時別九州聖功孰大論

先王之有天下也仰觀乎天俯察乎地天以四時為佐
故歷候不得不正也地以九州為紀故疆理不得不別
也昔在帝堯稽法天象申命羲和期三百有六旬有六
日以閏月定四時成歲暨禹乘四載分別九州隨山刊

木洪水無害然皆上古帝王之聖功而有區別焉夫聖人經始萬邦勞心百度皆欲先天時而後地道也三皇之季盛德廣大陶唐氏慮天時之不順正朔之不叙節候之失度日星之失次歷算之失數人民之失所乃命四岳欽若上天厯象日月星辰敬授人時所以明天道也洪水襄陵羣生昏墊夏后氏疏鑿山川流導四瀆分田壤之等降定貢賦之隆殺桑土既蠶生民粒食所以正地道也夫天時正則霜雪風雨於是乎可信上下經

紀於是乎可象芒甲羽毛於是乎茂育政令教化於是乎可期故辰弗集其房而夏君征其畔官火猶西流而仲尼罪其司歷蓋百王之大典上古之彛訓也然則定四時成歲何先乎閏餘說者曰周天三百六十有五度四分度之一以三百六十日為一歲餘六日三十日為月月行疾又歲餘小盡六日故五年再閏以定四時之氣也夫地道別則播種耘藝於是乎有常賦役職貢於是乎有典原隰墳衍於是乎定位昆蟲魚鼈於是乎有

宅然則平水土何先乎九州說者曰州者疇也言疇其土而分別之也蓋閏餘不正則厯象不叙厯象不叙則天紀擾矣田疇不分則貢賦不至貢賦不至則人事廢矣傳曰太上立德其次立功堯之道定四時而修天紀立德者也禹之道別地利而正人事立功者也功德之際固不同矣

九功九法為國何先論

夫有國家者稽攷往制裁為政術故彛倫攸叙萬事先

治經緯不紊於繁上下皆底于道然則以典故為政者
其大有二有九功焉書曰水火金木土穀正德利用厚
生是也有九法焉周禮曰制畿封國設儀辨位進賢興
功建牧立監制軍詰禁施貢分職簡稽鄉民均守平則
比小事大是也然則致治之本何從而先昔八世之君
不相沿襲帝者有帝道而御天下王者有王道而御天
下帝道廣而大其制也簡故其民從之而不拂王道明
而正其制也密故其民從之而不違當其陳九功于舜

禹之世其言要而其用也普其帝制之餘乎正九法于
姬周之始其言辯而其用也周其王制之餘乎夫萬物
非五材不用故九疇以五行為首民非五穀不食故八政
以食為先不正德則教化不達故書云德惟善政不利
用則民事不濟故易曰日用不知不厚生則國計不豐
故書曰民惟邦本由是善為國者修五材而民用足矣
貴穀而民食豐矣正德而天下之心服矣利用而邦家
之用濟矣厚生而百貨之本達矣故六府三事允治然

後可以制畿封以正其法辯儀位以節其事進賢才以
懲勸建牧守以司察詰軍禁以繩糾施職貢以制財簡
鄉民以施教均守則以結信正小大以表禮著為先聖
不刊之典垂為百王不易之道蓋夫帝制者尚道德者
也王制者尚法度者也先道德而後法度則民懷之而
從上矣若去道德而專任法度則四海之政官府之事
將有察而不勝者矣於戲臯陶周公之心可以知之矣

舜無為禹勤事功德孰優論

天生烝民立之司牧實曰天子天子必張官設吏布德
行惠以懷萬民驅之四方上下惟其所從在其治一也
而其道固不可同矣三五之君其治之至其德之盛際
天接地垂映列辟者皆曰舜禹則舜禹可以謂之盛德
夫舜以無為而治天下禹以勤事而陟元后然則無為
勤事其有隆殺矣夫聖人功業既殊教化皆異其德隆
者其功逸其德殺者其功勞逸者合於造化而及於物
者也勞者滯於形器而立事者也故言事者勞逸之際

不可不察也夫無為者逸也何以逸能任人也聖人勞
於求賢逸於得士當有虞氏納于大麓遂陟帝位任四
岳以主內事任十二牧以兼外政任大禹垂益伯夷夔
龍以平水土以典禮樂以掌山澤以治百工故可凝旒
垂纊而御遐邇當宁深拱而行教化德與天道契乎淵
默詩云不識不知順帝之則書云知人則哲能官人安
民則惠易曰垂衣裳而天下治其是之謂矣夫勤事者
勞也勞者何益自任也聖人憂勤以圖治躬親以底績

當夏后氏受帝之命又厥水土乘四載而導江河別九州而差貢賦任其桑土分其土宜聞啟之泣而不歸櫛風沐雨而無倦授元圭而告成功以聲身而為律度故能功著萬世濟于生民詩云弗躬弗親庶民弗信又云小心翼翼其是之謂乎故聖賢之言舜也則稱其德曰無為而治者其舜乎又曰舜有五臣而天下治言禹則稱其功曰盡力乎溝洫又曰微禹之功吾其為魚矣蓋德者形而上者也功者形而下者也立德立功之道其

殊久矣況禹受舜命而告厥成功乎

曾參不列四科論

登四科者十人而已德行顏淵閔子騫冉伯牛仲弓言語宰我子貢政事冉有季路文學子游子夏而曾參於孔門為達者也不預十哲之選其故何哉夫仲尼生周之末立定哀之間斯文中微不絕如綫乃以仁義之道行忠信之事攷其言行采其材智得是十子第為四科以標儒雅之道其選益至矣而參不列其間者念其道

有所未至矣試嘗論之曰孔氏四科之選皆有賢哲之
具體者哉非各言其一也賢者百行之先闕一不可顏
閔非獨以德行選也游夏非獨以文學舉也宰賜非獨
以言語稱也冉季非獨以政事擇也蓋有五常之具德
而後列其所尤至者哉故德行者豈無政事政事者豈
無言語言語者豈無文學斯互舉所長之言也而曾子
惟以孝行著聞不能具得能者之體但行其一端故所
以不列於十哲者也若孟子所謂伯夷叔齊聖人之清

者也言夷齊不食周粟采薇首陽蓋得聖人之一清德耳蹈道則未也由是觀之則參之事夫子學其道推其心但得聖人之一孝德耳言其材則未也或曰參也孝何以非賢哲夫十子者有四科之德豈無孝乎蓋孝在其中矣三千之罪莫大於不孝仲尼之門英賢之選而薄於孝行聖人之心何以言哉或曰孝者百行之先居在四科之上夫孝養之道誠為至性然莫逾於德行故仲尼嘗曰孝哉閔子騫而居德行之科蓋孝者無以逾於

德也是則有其德然後列在其間而參之孝一介之孝也仲尼嘗曰參也魯故為之說天子諸侯之孝以治邦國以及百姓以廣其志

開封府試三正循環宜用何道論

先王應天祚敷政令歷象為貴因損為重故春秋之義正月居王之下示正朔自王者出也當帝道標季王化資始夏商周之君代王寅丑子之正攸歟夏后氏憂勤而治溝洫禪讓而陟帝位以大族為正族者湊也萬物

湊地而生陽德之盛者也其色尚青其樂大夏祭禮尚
氣牲用驪駒商放桀而取神器慚德而朝萬國以大呂
為正呂者助陽宣氣盛德之中者也其色尚白其樂大
濩祭求諸陽時用日中周伐紂而王天下戎衣而威遠
邇以黃鐘為正鐘者種也律呂施種而出盛德之初者
也其色尚赤其樂大武禮貴兼用牲取騂牲於戲商循
于夏不敢居盛而處中周循于商不敢處中而履初故
觀之正則其道可知也仲尼曰行夏之時又曰吾欲觀

夏道是故之杞而不足徵也吾得夏時焉蓋知夏之律
歷四氣可以平分也三代之季秦以十月為正漢初因
其弊而終革之太初已降率以夏正為定典夫陽生于
子大人道長羣陰尚壯天地閉塞若政教立而未布文
章施而未煥陽漸于丑其氣欲勝宇宙凝沍庶物猶蟄
若刑政孚而未達化育至而未成陽發于寅其道大振
草木甲拆土膏脉起萬物喜其嘉會陰德伏其摧剥若
道德之教未畢禮樂之文皆至易所謂聖人作而萬物

觀之時也吁政有大小德有盛衰三王不可以共議三
正不可以同道當循環而後知其政德焉故史遷曰三
王之政如循環窮則反本國家革五代之弊繼隋唐之
基謂湯政多慚周業孔武恐不足以表仁義之化宜乎
用夏道躋禹德所以同時令齊閏餘節春夏之和正厯
候之始使告正朔于天下而民知其盛德焉君子曰邦
有道雖商周之正可也邦無道用夏正將無補

曹參守職論

漢曹參自齊入相飲酒繼日惠帝讓之參謝曰陛下自
察神武孰與高皇帝上曰朕安敢望先帝觀臣孰與蕭
何上曰似不及也參曰陛下之言是也且皇帝與蕭何
定天下具法令陛下垂拱參等守職遵而勿失不亦可
乎吁君之不逮在賢雋致之則堯舜可也已之不逮在
道德進之則臯夔可也況世革秦弊時在守文創業之
君則兵以詭勝事以時設有刑戮之威而無繩墨之制
高皇帝承秦弊而起遠近響應數年之間平定四海暨

繼世之君則當守仁義循法度制禮樂易章服撫內外
明刑罰官賢材親宗族所以基太平而遵王道也傳所
謂王者必世而後仁故文武之政周公制之成王襁褓
而德及三代豈成王之德參於文武乎參上不能致君
下不能自彊況治民乎君則限以高祖已則限以蕭何
而不知古聖賢有殊功異代者矣謂天下定而不可復
危法令具而不可復易我不擾則天下靜我無事則天
下定嗚呼三城長安役衆百萬簡易之道邪降灾雨血

桃李冬花無為之應邪勿失之職復可在哉蓋參祖尚
黃老飲酒不治憑託異說以致王室陵遲諸呂弄權實
參之自歟

獄市為寄論

夫先王獄以定刑市以聚物刑必正其枉直物必辨其
良偽其來尚矣漢曹參起於獄吏執圭而侯以將校之材
迹黃老之弊政事之失必以寬晚歲罷齊相屬後相曰
以獄市為寄慎勿擾焉相曰治無大於此乎參曰獄市

所以并容也今君擾之姦人安所容乎吁獄者鞠訊過
罪笞掠參至姦吏市法出入生死良民受辱引罪自誣
大獄一起冤者大半在乎察人情偽繩吏之深刻先王
以明慎用刑而不留獄禮曰悉其聰明致其忠愛以盡
之市者聚會民物貿遷有無貪賈縱欲翔貴時價憮民
幸利雜良以苦在乎節賾儉於末民戒巧詐於貪夫先
之以經制後之以教令周禮曰量度而成價質劑以結信
王制曰姦色亂正色五穀不時不鬻於市周孔二君子

制禮刊書罔不盡聖人之道絕姦宄之路故姬旦滅商
紂誅管蔡而成康刑措四十餘年仲尼為中都宰市無
二價路不拾遺蓋成之以廉耻防之以仁義衣食足而
民不爭刑罰舉而民不犯也而參以獄市之大并容不
擾蓋德吏而殘人命惠姦而耗民財亂則可期治乎何
有後相之語欲知大體參不能以正君臣尊王室審號
令提綱紀之道語之反以亂政寄為後患夫漢接秦弊
化墳籍煨燼世無所聞而黃老之語在焉苟擇其善者

從之亦可以少裨政事而參乃入不由戶反道亂常得
非舊獄掾縱姦為豪暨處上位惡傷其徒憑托異說以
惑於世邪悲夫

開東閣論

漢平津侯開東閣待賢當時諸儒亦有稱者近世以為
有急士之風美其事者多矣而或不知其意焉夫侯起
於徒步屢歷顯位而指陳兩端以惑時議棄背宿約以
阿上旨外無別材飾之以詐至於覆布被飯脫粟故買

臣難其短汲黯訐其僞自知無功以速官謗故設東閣假待賢之名以誘士大夫之譽夫待士者育其材觀其能採其謀而行之擇其賢而進之故平原下士得毛遂以安趙郭隗禮賓得樂毅而霸燕侯為相六年招待賢雋而史籍所載由其門出者卒無一人豈漢併六國而無賢乎當此之時匈奴寇邊諸侯構怨侯未始定一計以安之豈多士而無謀乎夫開閣而不能待士待士而不能與邱墟廐庫何異焉設使相天下者賢材在朝

則進之在野則升之豈開閭而後為賢哉於戲嚴助董仲舒之徒賢人也侯而陷之寧有進人之意邪蓋善為釣名任詐之術使後世美之惜哉

不教吏職論

漢薛宣不教子惠以吏職漢書備之矣且曰吏道以法令為師何可學也時人以為然夫國之大者君臣也家之大者父子也君臣正則國政行父子正則家道成君明而能教臣忠而能諫則國之正矣父慈而能訓子孝

而能爭則家之正矣石碣教子以義方仲尼戒鯉以詩禮韋賢授之以一經鄧禹專之以一藝後世稱之夫成童不就師傅父之罪也況父而不教乎蓋事莫大於學學而後能其事銷金石者不累日揉曲木者不累月若教子以一經之書三尺之法則不止於職也夫吏職者民以寬猛吏以畏愛事以時變教以俗設府寺州縣郡國天下雖大小異器而其政一也何謂不可學哉夫生而知之則周公仲尼其人也自茲以降未有不學而成者

漢興則仲舒學春秋而建大議安國學尚書而為通材
君明學易而知變稚圭學詩而從政故制斷無失宰割
有宜厥功茂焉宣謂不可學者蓋起於獄吏斗食之下
暴歷顯位不習經義何以語人哉嗚呼吏事不能言況
大道乎子不能教況生民乎故當宰天下之際官屬議
其煩碎天子淺其儒術六年無補於政事宜其放棄焉
李德裕非進士論

唐文宗議貢舉曰子弟寒門但取實藝宰相李德裕對

曰臣無名第不合言進士之非其祖尚浮華不根實藝
朝廷顯官須公卿子弟自小便習舉業日熟朝廷間事
臺閣儀範不教而自成寒士固不能習也夫治平之器
曰政布政之具曰文守文之基曰道行道之夫曰士士
之於政由左右手焉故有國之典先夫取士雖沿革異
軌而同歸求聘之塗古者諸侯薦賢有三適之制射宮
選士觀五善之節姬周受命文物明脩羣吏獻賢能之
書登于天府樂正論造士之秀升於司馬進士之名立

矣禮賢之道廣矣暨六國行玉帛之聘兩漢立四科之選魏晉或表薦而登仕齊梁或版辟而起家故孝廉明經之科秀才茂才之舉限口限年之制射策待詔之選損益無常而察言觀德之規不妄設也李唐御統艱厥制度立進士之科正名也行辭賦之選從時也而天下之士誦詩書兼刀筆乘仁義之道而進朝廷闢場屋詔宗伯以方圓曲直而取名材大儒比比而有然詩賦之制非古也古者國風雅之謂詩不歌而頌之謂賦暨三

季移統七雄黷武大道既隱正音去矣故少卿五字以叙別鄒孟四言以述祖陸謝勵鋒於晉宋任范治榮於齊梁詩之體失矣頌刺之義微焉若孫卿暢幽惻之意屈宋起迂誕之說相如閎衍以前導揚雄淫麗而後嚴賦之體隳矣規諷之旨衰焉唐興文流愈甚前失執彫飾為規矩正麗偶為繩墨詩則協聲而合律賦則限韻而拘字燦然清才而不復質矣譬諸栢梁永明體猶若秦漢之於唐虞也故德裕許其浮華則可矣至於言朝

廷顯官須公卿子弟斯言之玷無乃甚歟夫諸侯襲封
功臣繼絕須子弟奉祭祀而爵及世也若其靡恃門閥
之貴屈身士大夫之間講習仁義延揖時譽有緇衣之
美成作述之志雖寒士之賢弗可加也若其尚輕肥之
飾馳逐豪俠之伍以奢僭自太意氣相燦不知衣食之
出而忘弓裘之業雖將相之世不可任也哀哉堂構之
業多隆嗣興之賢甚寡若子弟不教而成則堯之丹朱
舜之商均皆可君天下也況父母之聖非教不行也國

之治非目不熟也臣之良非師保之無功也何教之而不成目熟而不知保傳而無補哉蓋上智下愚之不移也故楊興說於史高母薦乳母子弟王吉疾其驕驕請除任子之令則知子弟之才非專任之器也詩曰其父析薪其子不克負荷書曰世祿之家鮮克由禮況朝廷崇爵豐祿設官分職治亂之道不在它而在賢愚也子弟寒士賢治愚亂其一揆也然則子弟以嗣蔭而受祿士以歷試而頒爵歷試之下黜陟章明故士之不肖者

鮮矣至如傳說胥靡而興湯呂望屠釣而王周管仲商
販而霸齊由余戎狄而強秦斯皆歷試諸難登將相之
任誠不讓於子弟也故舜湯不用三公九卿之世而舉
臯陶伊尹不仁者遠矣易曰賁于丘園書曰野無遺賢
則豈謂子弟邪若以寒士窘急衣食不能熟習德業則
仲舒下帷倪寬帶經乃子弟耶若以寒士杜門閭巷不
識闕朝儀範則仲尼正魯國之雅頌叔孫定漢之儀制
亦子弟耶夫志士之學也終日不食終夜不寢將負周

孔之戈而春楊墨之喉以聖君之道左之生民之心右之誓銷漓薄之器於太平之爐故遑遑然急於行道也雖九經之典必獲仁義之旨載籍之廣必取禮樂之制前言往行燦燦在目立於朝無慚色無愧辭也書曰學古入官此之謂與得士之道不其偉哉詩曰思皇多士生此王國於戲宰制天下代天工也當改正朔易服色制禮樂發號令革襲因損頤指而行何不合言之有苟以選舉之制離失中道則以德進以事舉以言揚擇善

而行斯可也苟謂辭賦非古則策以時務問以康濟非五經不得以對非常道不得以言則經緯之術宏達之材見矣而德裕以林甫餘烈陟位國相知簡賢附勢之旨無宰制補衮之德而場屋之下英傑間出縉紳之士勲名相望欲騁材術專國政不可得矣故將隳貢舉以杜賢路進子弟以崇私黨俾朝廷之人無能傑出已右故宣宗制曰委國史於愛壻之手寵祕文於弱子之身洎參信書亦引親暱斯乃扼其咽喉而中其膏肓矣厥

有朱崖之貶以謝天下宜哉

議

秦烏氏倮與朝請議

議曰王者賞不失功爵不墜典車服有等貴賤有別所以
賢者知勸而禮不踰閑也秦負戰霸之業竊乘帝王之
器下良民而右富商棄禮文而圖貨殖烏氏倮以繒絲
私遺戎王谷量牛馬令比封君而與朝請吁非三公九
卿之世無平邊富人之策徒以交市夷狄畜聚蕃育起

於商販之下而伍侯伯始無一命之重而參朝謁名器
兩失禮義交喪古者位以制賢祿以疇庸論道經邦以
被公袞積行累功以致侯服今茲澆漓淫而不典儒學
之道固敵貨賄之力將相之世靡及并兼之家雖天子
親傳組紱躬給廩食位不足以勸賢材矣古者朝以辨
等覲以頒制玉帛修贄而後會等威有序而後見今用
非辟彛倫喪敗銀黃之貴而肩綦牧之夫明堂之下而
朝畜產之主雖闕廷日定冠冕歲制輿服禮不足以別

貴賤矣使耕隴之民游手商賈衷奇珍之貨私匈奴之人修六擾之業競刀錐之利滯貨以要君上累鋸而駕公族翕然風從以競末作是則稼政不修蒔器不緝栖畝之糧不暇穫吐絲之蠶不及飼卒有凶札之變兵革之急萬民罄金玉不以餬口六軍凍瘡牛馬不以挾續雖欲復農不可得也於戲惟名與器不可假人賞罰自失沮勸則差故禮賜君子小人尚不同日益慎之也守國之器禮之為大去禮而行何以享國宜慎守之哉

唐免宗人役議

議曰復徭役者地則兵火凋殘水旱沴疫行幸所經戶籍新復人則鄉有善行家無兼丁者預焉斯有國者之典法也李唐氏受命之二載詔天下宗人無徭役吁李氏之姓伯陽之後周距隋季且千餘祀姓族滋蔓率十三四馬既高祖乘隋室之弊北起晉陽西圖函夏百姓烏合以附成大業者非獨李氏也何黨之甚歟書曰一人有慶兆民賴之又曰元后作民父母是則天下之親

皆親也天下之姓皆姓也若諸侯陪臣因王父之字以
為氏則天下之民以君為氏明矣而不姓之者不可一
也三皇之世則三皇之民也五帝之世則五帝之姓也
堯之民比屋可封非獨祁氏也紂之民比屋可誅非獨
子姓也禮曰不獨親其親不獨子其子書曰無黨無偏
王道平平傳曰君子不患寡而患不均斯焉之義何以
處之前所謂兵火而免者蘇其業也水旱而免者濟其
艱也行幸而免者醵其費也新復而免者寬其作也有

善行而免者勵修德也無兼丁而免者俾養親也至於
同姓而免者餘不知其所利焉則天下豪猾之民將棄
已氏而即李姓濶耕廣種而幸成其私行之不已則天
下之姓三分而二冒於李矣

文莊集卷二十